

**ASO LUA, 29 ME 2018**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOFOGA FETALAI**

**FOFOGA FETALAI:** Ou te faasilasila atu ua toe amataliaina nei Taulumaga a le Fono Aoaofa Fofoga Fetalai.

E avea foi leni avanoa ou te faatalofa atu ai ma le agaga faaloalo i lau Afioga i le Palemia faapea foi le mamalu o le Kapeneta ma sui usufono filifilia o leni Palemene e ala i Taitaifono o Komiti eseese. E faapea foi ona faatalofa atu i Faauluuluga o Matagaluega ma Faalapotopotoga a le Malo, e faapea foi le Ofisa o le Fono ma le mamalu o le Matagaluega o Leoleo i le latou auaunaga faifaipea i lea aso ma lea aso, aemaise foi o le tapuaiga a le atunuu.

Ia e faamoemoe i le Atua galuega o leni aso e ala i le valaauina, ina ia faapena ona tatou manu faaifo mai le lagi ia so outou finagalo, ina ia maua se ai o le taulafoga, ae a le tapuaiga a si o tatou atunuu.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Fofoga Fetalai na te iloiloaina ai ia Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.2) 2017/2018.
2. Tulafono Tau Faaofi o le Faatatauina o Tupe 2018/2019.

**TUUIINA ATU** i lou nei Lima i leni aso 28 o Me 2018.

**(Sainia): Tuimalealiifano Vaaletoa Sualauvi II**  
**OLE AO O LE MALO.”**

29 ME 2018

### TUUINA ATU O PEPA

*Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.49.*

1. P.P. 2018/2019 Nu. 3, Lipoti Faaletausaga a le Matagaluega o Aoga, Taaloga ma Aganuu 2017.
2. P.P. 2018/2019 Nu. 4, Lipoti Faaletausaga a le Ofisa o le Pule Faatonu mo le Tausaga 2016/2017.
3. P.P. 2018/2019 Nu. 5, Lipoti Faaletausaga a le Pulega o Uafu ma Taulaga mo le Tausaga 2016/2017.
4. P.P. 2018/2019 Nu. 6, Lipoti Faaletausaga a le Komisi o Galuega a le Malo mo le Tausaga 2016/2017.
5. P.P. 2018/2019 Nu. 7, Faamatalaga o Tupe a le Malo mo le Tausaga 2016/2017.
6. P.P. 2018/2019 Nu. 8, Lipoti Faaletausaga a le Matagaluega o Faatoaga ma Faigafaiva mo le Tausaga 2014/2015.
7. P.P. 2018/2019 Nu. 9, Lipoti Faaletausaga a le Matagaluega o Faatoaga ma Faigafaiva mo le Tausaga 2015/2016.
8. P.P. 2018/2019 Nu. 10, Lipoti Faaletausaga a le Matagaluega o Faatoaga ma Faigafaiva mo le Tausaga 2016/2017.
9. P.P. 2018/2019 Nu. 11, Lipoti Faaletausaga a le Matagaluega mo Tupe Maua mo le Tausaga 2016/2017.
10. P.P. 2018/2019 Nu. 12, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga 2016/2017.
11. P.P. 2018/2019 Nu. 13, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2016/2017.
12. P.P. 2018/2019 Nu. 14, Lipoti Faaletausaga a le Pulega o Faaputugatupe Teufaafaigaluega o Mavaega Tausi a Samoa mo le Tausaga 2016/2017.
13. P.P. 2018/2019 Nu. 15, Lipoti Faaletausaga a le Iunivesite Aoao o Samoa mo le Tausaga 2016/2017.
14. P.P. 2018/2019 Nu. 16, Fuafuaga o Atinae a le Iunivesite Aoao o Samoa mo le Vaitaimi 2017/2018-2020/2021.
15. P.P. 2018/2019 Nu. 17, Lipoti Faaletausaga a le Matagaluega o Faamasinoga ma Pulega Tau Faamasinoga mo le Tausaga 2016/2017.
16. P.P. 2018/2019 Nu. 18, Lipoti Faaletausaga a le Auaunaga Faale-Soifua Maloloina mo le Tausaga 2016/2017.

### TUUINA ATU O LIPOTI A KOMITI FAA-PALEMENE

*Na tolaulau e le Failatuusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.51(5).*

1. P.P. 2018/2019 Nu. 19, Lipoti a le Komiti o Tupe Maua ma Tupe Totogi i le P.P. 2017/2018 Nu. 151, Lipoti Faaletausaga a le Faalapotopotoga o Mea Tau Fale a Samoa 2017.

29 ME 2018

**Tuuina atu o Lipoti a Komiti Faa-Palemene**

2. P.P. 2018/2019 Nu. 20, Lipoti a le Komiti o Tupe Maua ma Tupe Totogi i le P.P. 2017/2018 Nu. 154, Lipoti Faaletausaga a le Falemeli o Samoa 2016/2017.
3. P.P. 2018/2019 Nu. 21, Lipoti a le Komiti o Tupe Maua ma Tupe Totogi i le P.P. 2017/2018 Nu. 157, Lipoti Faaletausaga a le Matagaluega o Tupe 2015/2016.
4. P.P. 2018/2019 Nu. 22, Lipoti a le Komiti o Tupe Maua ma Tupe Totogi i le S.R. 2018/1, Tulafono Faatonutonu a Kamupani Tausi Mavaega (*Totogifuapauina ma Pepa Faatumu*) 2017.
5. P.P. 2018/2019 Nu. 23, Lipoti a le Komiti o Tupe Maua ma Tupe Totogi i le S.R. 2018/2, Tulafono Faatonutonu o Faaputuga Oa Resitalaina (*Totogifuapauina ma Pepa Faatumu*) 2017.
6. P.P. 2018/2019 Nu. 24, Lipoti a le Komiti o Tupe Maua ma Tupe Totogi i le S.R. 2018/3, Tulafono o le Fafoega o Taaloga Eeseese Tau Tupe 2017 ó Faasilasilaga o le Amata Faamamaluina.
7. P.P. 2018/2019 Nu. 25, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu. 155, Lipoti Faaletausaga a le Matagaluega o Faamasinoga ma Pulega Tau Faamasinoga 2015/2016.
8. P.P. 2018/2019 Nu. 26, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu. 158, Lipoti Faaletausaga a le Komisi o le Toefuataiga o Tulafono a Samoa Iulai 2016-Iuni 2017.
9. P.P. 2018/2019 Nu. 27, Lipoti a le Komiti o le Vaega Tau le Va Fealoai i le P.P. 2017/2018 Nu. 153, Lipoti Faaletausaga a le Matagaluega o Leoleo 2015/2016.
10. P.P. 2018/2019 Nu. 28, Lipoti a le Komiti o le Vaega Tau le Tamaoaiga i le P.P. 2017/2018 Nu. 150, Lipoti Faaletausaga a le Kamupani Vaalele a le Polenisia 2017.
11. P.P. 2018/2019 Nu. 29, Lipoti a le Komiti o le Vaega o Atinae Eeseese i le P.P. 2017/2018 Nu. 115, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe 2015/2016.

**FOFOGA FETALAI:** Malo faafetai.

**LAFO A LE TAITAI O LE MAOTA (TT 47)**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai e tatou te auai faatasi i le viiga ma le faaneetaga na e tapenaina i lo tatou Atua aua le taitaiina ma le manuia mai o le soifua o auauna nei, aua o ana auauna nei i le Maota o Samoa.

29 ME 2018

**Lafo a le Taitai o le Maota (TT 47)**

Lau Afioga i le Fofoga Fetalai, ou te tulai atu ma le ava tele e faatu le lafo, *Ina ia faaauau Galuega Tuua a le tatou Palemene mai le Tauaofiaga 2017/2018 e pei ona lomiai ai i le Pepa Faaopoopo o Galuega 2018/2019 Nu. 1, e tusa ai ma Tulafono Tumau 47.*

*Faaluaina e le Minisita mo Pisinisi ma Alamanuia, ma le Minisita mo le Soifua Maloloina.*

*Na faamaonia le lafo.*

**LAFO A TAITAIFONO O KOMITI FAA-PALEMENE (TT 45)**

**FOFOGA FETALAI:** Ou te tapa lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

Tulai mai lau Afioga i le Taitaifono lau Afioga i le Sui Fofoga Fetalai.

**Tofa NAFOITOA TALAIMANU KETI (Sui Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai, e manatu o lea ua maea ona e lafo le uepa i tuaau, ae faatili foe mo le ae, aua le Fonousu a Samoa, ia tau i manu le faamoemoe o lenei vaiaso. Ua e ave foi le sao ia Manuvao ae a le ta taitaiga a lo tatou Tapaau i le lagi, ua afua ai ona feiloai i manu ma manuia Taitai o le atunuu i lenei taeao. Ia foi ia i le Atua Lona viiga e le aunoa.

E faatalofa foi i le tapuaiga a le atunuu mai mauga tetele se i oo lava i mauga iti, e faapea foi isi o matou itumalo o Gagaemauga Nu. 3, aua le aiga Sa Peseta ma lo latou Maopu, le nofo a Usoalii i le Faleiva ma le igoa mamalu o Matautu o le Faamalugaomalo. Malo le soifua, malo le tapuai.

Lau Afioga i le Fofoga Fetalai, ua ou tulai atu e faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloaina ai Galuega e valu (8) na tuuina mai i lenei Komiti, ona e le i maea atoatoa i ai ana iloiloiga, ma lipoti mai ai i le Fono Aoao i le Fonotaga o Oketopa o le tausaga nei.*

*Faaluaina e le sui usufono mo Vaimauga Sasae, ma le sui usufono mo Falealili Sasae.*

*Na faamaonia le lafo.*

**FOFOGA FETALAI:** Ou te tapa ma le faaloalo lau Afioga i le Taitaifono o le Komiti o le Vaega Tau le Va Fealoai.

Tulai mai lau Afioga i le Taitaifono.

29 ME 2018

**Lafu a Taitaifono o Komiti Faa-Palemene (TT 45)**

**Afioga Hon GATOLOAIFAANA AMATAGA ALESANA-GIDLOW (Taitaifono o le Komiti o le Vaega Tau le Va Fealoai):** Lau Afioga i le Fofoga Fetalai ou te faatu le lafo, *Ina ia tuuina mai e le Fono Aoa se Faatagaga e faaopoopo ai le taimi e iloiloina ai le Tulafono Tau Faaofi o Teuteuga o le Tulafono o le Puipuiga mai Aafiaga o le Tapaa 2018 na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoa i le Fonotaga o Oketopa o le tausaga nei.*

Ma lou faaaloalo lava.

*Faaluaina e le sui usufono mo Palauli le Falefa, sui usufono mo Siumu, ma le sui usufono mo Vaimauga Sasae.*

*Na faamaonia le lafo.*

**FOFOGA FETALAI:** Ma lou faaaloalo ou te tapa lau Afioga i le Taitaifono o le Komiti o le Vaega o Atinae Eeseese.

Tulai mai lau Afioga i le Matua.

**Afioga TAFUA MALUELUE TAFUA (Taitaifono o le Komiti o le Vaega o Atinae Eeseese):** E faatalofa atu i lau Afioga i le Fofoga Fetalai, faapea foi le mamalu o sui usufono i lenei taeao fou i latou uma o lo o faatasia i totonu o lenei Maota, e faapea foi ona faatalofa atu i le faafofogaaga a Samoa o lo o faafogafoga mai, talofa lava.

Lau Afioga i le Fofoga Fetalai ma le faaaloalo, ou te tulai atu ai e faatu le lafo, *Ina ia tuuina mai e le Fono Aoa se Faatagaga e faaopoopo ai le taimi e iloiloina ai Galuega e lua (2) ua taua i lalo na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoa i le Fonotaga o Oketopa o le tausaga nei.*

1. *Tulafono Tau Faaofi o Teuteuga o le Tulafono o le Faaliliuina o Fanua Faale-aganuu 2017.*
2. *P.P. 2017/2018 Nu. 152, Lipoti Faaletausaga a le Pulega o le Suavai a Samoa mo le Tausaga Faaletupe 2016/2017.*

Ma le faaaloalo.

*Faaluaina e le sui usufono mo Palauli le Falefa, sui usufono mo Siumu, ma le sui usufono mo Vaimauga Sasae.*

*Na faamaonia le lafo.*

29 ME 2018

**TULAFONO TAU FAAOFI O LE FAATATAUINA O TUPE  
FAAOPOOPO (NU. 2) 2017/2018 – faitauga muamua**

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu. 2) 2017/2018 i lona faitauga muamua.*

*Faaluaina e le Minisita mo Aoga, Taaloga ma Aganuu, Minisita mo Fesootaiga, Faamatalaga ma Fesootaiga Vavave Faaneionapo. ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TALA FAATATAU O TUPE FAAOPOOPO (NU. 2) 2017/2018  
– faataatia i luga o le Laulau a Fono**

*Na faataatia i luga o le Laulau a Fono e le Afioga Hon Sili Epa Tuioti, Minisita o Tupe le Tala Faatatau o Tupe Faaopoopo (Nu. 2) 2017/2018.*

**TULAFONO TAU FAAOFI O LE FAATATAUINA O TUPE  
FAAOPOOPO (NU. 2) 2017/2018 – faitauga faalua**

**Afioga Hon SILI EPA TUIOTI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu. 2) 2017/2018 i lona faitauga faalua.*

*Faaluaina e le Minisita mo Faamasinoga ma Pulega Tau Faamasinoga, Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu, Afioga ma Agafesootai.*

**FOFOGA FETALAI:** Ia ma o le avanoa foi lenei e saunoa ai lau Afioga i le Tala Faatatau o Tupe Faaopoopo (Nu.2) 2017/2018.

Tulai mai lau Afioga i le Minisita mo Tupe mo lau saunoaga.

**SAUNOAGA O LE TALA FAATATAU O TUPE FAAOPOOPO  
(NU.2) 2017/2018**

**Afioga Hon SILI EPA TUIOTI:** Lau Afioga i le Fofoga Fetalai faapea le mamalu o sui usufono o le Maota nei, e puupuu lava le faamatalaga i le Tala Faatatau o Tupe Faaopoopo (Nu. 2) 2017/2018, ona o le faaogaina o nisi o vaegatupe \$5,62,593 o vaegatupe ia ua tuuina atu i le Matagaluega o Tupe Maua mo se faatauina o se taavale e manaomia aemaise lava i le faatinoga o le galuega, ia faapea le \$5milionua ua tuuina atu ua fuafuaina mo le auaunaga faale-soifua maloloina, ina ia faapea ona mafai ona faamama ai ma totogi aitalafu tuua a lenei Matagaluega ma le faamoemoe, a amatatia loa le tausaga fou, o le a mafai ona fai se amataga lelei o lenei auaunaga e le toe afaina ona o le toe totogi o aitalafu ua i ai i aso ua mavae.

29 ME 2018

**Saunoaga o le Tala Faatatau o Tupe Faaopoopo (Nu.2) 2017/2018**

O le faatupeina o lenei Tupe Faaopoopo, ua maua lea i le vaegatupe \$2miliona na maua mai i le Matagaluega o Tupe, ia faapea ma le vaegatupe na maua mai i tupe maua faaopoopo a le Matagaluega o le Siosiomaga, ma o le aofaiga atoa e leai se tupe faaopoopo, o lo o mafai lava ona faatupe lava ia tatou tupe faaalu lea ua i ai nei mai tupe ia i le fetuunaiga o tupe i totonu o Matagaluega ia faapea le tupe tele lea \$2miliona ma ona tupu o tupe maua mai i le Matagaluega o auunaga o le Soifua Maloloina sa le i maua, ae o lea ua maua talu ona tuuina mai i le Ofisa o Tupe e faatinoina le gaoioiga o le Tala o le Tupe ma aiaiga o tupe faaalu a le Matagaluega, o lea ua maua ai le vaegatupe lea o le a toe fesoasoani ai e toe tuu i totonu ina ia faapena ona faagasolo ai ia le tatou auunaga faale-soifua maloloina i le amataga o le tausaga faale-tupe.

O le faamatalaga puupuu lea lau Afioga i le Fofoga Fetalai.

**FOFOGA FETALAI:** Malo faafetai, e tusa ai ma Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu. 2) 2017/2018 e le itiiti ifo i le 14 aso, a o tuuina atu le Tala Faatatau o Tupe Faaopoopo (Nu.2) 2017/2018 i le Komiti o Tupe Maua ma Tupe Totogi mo le iloiloaina, ma toe lipoti mai i le Fono Aoa.

**TULAFONO TAU FAAOFI O LE FAATATAUINA O TUPE 2018/2019  
– faitauga muamua**

**Afioga Hon SILI EPA TUIOTI:** Lau Afioga i le Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2018/2019 i lona faitauga muamua.*

*Faaluaina e le Minisita mo Fesootaiga, Faamatalaga ma Fesootaiga Vavave Faaneionapo. ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TALA FAATATAU AUTU O TUPE 2018/2019  
– faataatia i luga o le Laulau a Fono**

*Na faataatia i luga o le Laulau a Fono e le Afioga Hon Sili Epa Tuioti, Minisita o Tupe le Tala Faatatau Autu o Tupe 2018/2019.*

29 ME 2018

**TULAFONO TAU FAAOFI O LE FAATATAUINA O TUPE 2018/2019  
– faitauga faalua**

**Afioga Hon SILI EPA TUIOTI:** Lau Afioga i le Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2018/2019 i lona faitauga faalua.*

*Faaluaina e le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo ma faitauina le Tulafono Tau Faaofi o le Faatatauina o Tupe 2018/2019 i lona faitauga faalua.*

**FOFOGA FETALAI:** Faafetai, o le Saunoaga o le Tala Faatatau Autu o Tupe 2018/2019, ma ou te tapa lau Afioga i le Minisita o Tupe mo lau Saunoaga faamalamalama.

**SAUNOAGA O LE TALA FAATATAU AUTU O LE TUPE 2018/19  
“Filifiliga Toa”**

**Afioga Hon SILI EPA TUIOTI:** Lau Afioga i le Fofoga Fetalai, e tusa ai ma le Tulafono Tumau 131, e ia te au le ava tele ma le faaaloalo e tatau ai, e fai ai au ma sui o le Malo ou te tuuina atu se ootootoga o le Tala Faatatau Autu o le Tupe mo le tausaga faale-tupe 2018/19 i luma o le Laulau a Fono a le Palemene.

**I. FAAVAE O LE TALA O LE TUPE**

Lau Afioga i le Fofoga Fetalai, i le tapenaina o le tatou folauga mo le tausaga faale tupe o lumanai nei, e tatau ona tatou tepa i tua ma auiliili taunuuga sa ausia i tausaga ua tuanai, aua e t ua tele lesona mai mea na tutupu i tausaga ua tuanai le tuanai e faufau ai le lumanai.

Lau Afioga i le Fofoga Fetalai, e lagona le agaga faagaetia ou te folasia ai i le Maota nei, le tulaga mauaa o lo o i ai nei lo tatou tamaoaiga. E ui lava sa satia le tatou malaga i tausaga ua mavae i fit ma faigata, peitai na maoae le siitia o le tamaoaiga i le tausaga 2015/16 lea na oo atu i le 7pasene. Na mafua lea tulaga ona o le sii maualuga o le sao a le vaega o faiga faiva faapea le tatalaina o faletalimalo a le Aggie Greys i Vaisigano ma le Taumeasina Island Resort faapea taaloga faava o malo sa faia i Samoa nei. Na toe agai le tamaoaiga i lona faatupulaia masani ma ausia ai le 2.5% i le tausaga 2016/17.

O le tulaga mausali o le tamaoaiga na faavae i le pulea lelei o tupe a le Malo e ala i le fuafua tatau o tupe faaalu. Faapea foi le sao taua o faiga faavae tau tupe lea na tuuaititia ai le tau o le soifuaga i lalo ifo o le tapulaa sa fuafuaina. Sa mausali foi le faiga faavae mo feafaatauaiga ma ausia ai tapulaa fuafuaina o seleni mo feafaatauaiga. Mo le silafia e sui mamalu o le maota, o lea tulaga sa faamaonia e le IMF i lana iloilogia o le tamaoaiga o Samoa ia Fepuari o le tausaga nei e pei foi ona sa faatinoina ia Fepuari o le tausaga 2017.



29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

O le pine faamau lea o le taunuu lelei o faiga faavae sa folafola ma faatinoaina e le Malo i tausaga ua sola ma avanoa ai seleni mo le faatupeina o auaunaga o loo manaomia e le mamalu o le atunuu.

Sa faatinoaina foi e le Malo taunuuga o le Iloiloga o Tupe Maua ina ia mafai ona ausia tupe maua faaopoopo e faatupe ai galuega tetele faapea manaoga mo aoaoga ma le soifua maloloina.

**II. VAAIGA TAULA’I I LE LUMANAI**

Lau Afioga i le Fofoga Fetalai, i le agai atu i le lumanai, e faaauau pea le tulaga lelei o le tamaoaga ma o lo o fuafua e ausia le 1.8% i le 2017/18 ona o aafiaga o le tapunia o le Yazaki. Peitai o lo o fuafua e oo atu i le 3.3% le malosi o le tamaoaga i le 2018/19. E mafua lea ona o le sao a kamupani fou o lo o faaogaina le fale sa i ai le Yazaki mo le fausia o oloa e toe faatau atu i fafo ma ua maua ai foi le faaopoopoga o avanoa faigaluega, faapea galuega tetele e i ai alatetele ma alasim . I le 2019/20 e ono oo atu le tamaoaga i le 3.7% ona o le faatupulaia pea o turisi faapea le sao o Taaloga a le Pasefika lea o le a talimalo ai Samoa ia Iulai o le 2019.

Lau Afioga i le Fofoga Fetalai, o se tamaoaga mausali, o lona uiga, o se lumanai manuia ma le saogalemu mo o tatou tagata. O le a faaauau pea le faatinoaina e le Malo o faiga faavae ma taiala talafeagai ina ia maua e o tatou tagata avanoa faapisinisi, fefaatauaiga ma galuega e faavae ai se soifuaga manuia ma le saogalemu. O le a faaauau pea foi le faasoaa tatau o tupe a le Malo aemaise faiga faavae tau tupe talafeagai e uunaia ai se tamaoaga mauaa ma le mausali.

Peitai e le tatau ona tatou faatamala, aua e lamatia pea lo tatou tamaoaga e le tele o faaletonu ma faafitauli e masani ona aafia ai le soifua mauia o tagata ma le sologa lelei o le faatupulaia pea o le tamaoaga. E lamatia pea tatou e afa ma lologa ona o fesuiaiga o le tau ma e ono faaleagaina ai se vaega tele o lo tatou atinae ma manaomia ai ni seleni se tele e toe faaleleia ai. E ono manaomia ai foi nisi nonogatupe faaopoopo mo galuega toe faaleleia ma ono aafia ai le tulaga o aitalafu. O lo o faamalumalu pea foi le aafia o tupe faamomoli mai fafo ona o puipuiiga faa faletupe ma ono aafia ai a tatou seleni mo fefaatauaiga.

O le mea lea e matu alagatatau ai lava ona mataitu totoa ma pulea lelei lo tatou tamaoaga ina ia faatupulaia ma faaauau pea le tulaga lelei o lo o i ai nei.

O le matafaioi aupito sili ona taua a le Malo o le faasoasoa tatau o seleni. O lona uiga e fua le manao i le seleni ua maua. E le ausia se lumanai manuia mo Samoa pe afai tatou te faalagolago tele i aitalafu. O le feau taua o lenei tala o le tupe ina ia faasoasoa tatau tupe faaalu ina ia ausia se tamaoaga mausali.

O le tapulaa mo le faasiliga o tupe faaalu nai lo tupe maua e 3.5% o le tamaoaga. O lo o fuafua e ausia lea tapulaa i le tala o le tupe lenei. Peitai o le naunautai o le Malo ina ia saga faaitiitia lea tapulaa e pei ona maitauina i le 2015/16 lea na ausia ai le 0.4% ma le 1.1% i le 2016/17.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

O le mea lea e tatau ai lava ona taofiofi tupe faaalu faatasi ai ma le siitia o tupe maua mai auala e tutusa ma talafeagai mo tagata uma.

**III. TAIALA O LE TALA O LE TUPE**

Lau Afioga i le Fofoga Fetalai, so o se tala o le tupe lava, e faavae i filifiliga ma faaiuga faigata. E tatau i le Malo ona filifili po o fea e ave i ai le faamuamua ó po o polokalame ma auunaga i le taimi nei po o le faasao mo atinae mo le lumanai. E tatau foi ona filifili poo fea manaoga e faatino aua e le tutusa manaoga o itutino eseese o le atunuu ma e le gafatia foi e tatou tupe maua e faatinoa uma manaoga i se tausaga e tasi. A o le faavae o nei filifiliga uma ina ia mauaa ma mausali le tamaoaiga aua e le mafai ona ausia se lumanai manuia pe afai e faaletonu fuafuaga ma le faatupeina o le tamaoaiga.

O le sini autu la o lenei Tala o le Tupe o le *“Filifiliga Toa”*. O lona uiga e tatau ona sao le filifiliga i vaega e tatau ona ave i ai le faamuamua ina ia mafai ona tali atu i manaoga o le mamalu o le atunuu ma fausia se lumanai manuia. O lenei foi sini autu o lo o faaaauai le feau sa folafola i tausaga ua mavae ina ia tali atu i manaoga o le atunuu i le taimi nei ma tapena se faavae ma se fuafuaga mautu mo se lumanai manuia ma le saogalemu o Samoa i le isi 20 tausaga o i luma.

Lau Afioga i le Fofoga Fetalai, e pei ona silafia e Sui Mamalu o le Maota o se tasi o vaega taua o le tala o le tupe i le tausaga ua tuanai o le faatinoga lea o fautuaga a le Iloiloga o Tupe Maua ina ia siitia tupe maua mai le lotoifale ma le naunautaiga ina ia tutusa ma talafeagai le totogiina o lafoga. E tele fautuaga sa fuafua e faatino ina ia siitia ai tupe maua mai lafoga ma ia mautinoa e faalaugatasia tutusa tagata uma i le totogiina o lafoga.

E le i ausia taunuuga sa fuafuaina i le tausaga muamua. E ui e i ai vaega sa siitia, i lona aotelega e lei ausia le tapulaa sa fuafuaina. O le aafiaga o lea tulaga, o le l mafai lea ona faatino atinae ma polokalame uma sa fuafuaina mo le tala o le tupe lenei. Peitai ua galulue soosootauau nei le Malo ma a tatou paaga mai fafo ina ia tatou agavaa i a latou fesoasoani tau tupe e faatupe ai nisi manaoga t ua o le mamalu o le atunuu faapea le fausia o atinae tetele e anagat .

Lau Afioga i le Fofoga Fetalai, e leai nisi lafoga fou o fuafua i lalo o le tala o le tupe lenei. Peitai o le a ave le faamamafa i le usitaia o le totogiina o lafoga ó ina ia mautinoa e totogi lafoga tagata taitoatasi faapea pisinisi e pei ona aiaia i lalo o le tulafono. E le talafeagai ona tauave fua e tagata ma pisinisi o lo o faamaoni i le totogiina o lafoga, tupe paø ona o lafoga ua le mafai ona aoina ona o le l faamaoni o isi tagata ma pisinisi e totogi a latou lafoga.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

**Aoaoga ma le Soifua Maloloina**

I le tala o le tupe ua tuanai, sa folafola ai e le Malo le iloiloina o le vaega o aoga ma le soifua maloloina ina ia mautinoa o lo o manino vaega e ave i ai le faamuamua ma ia faasoa tupe faaalu ina ia maua e tagata uma avanoa mo ia auunaga faapea le ausia o taunuuga aupito sili ona lelei. O lea ua maea nei iloiloga ma ua faamaonia mai ai e ui o loo tulaga lelei le auunaga a vaega nei e lua. Peitai e i ai vaega e tatau ona tulituliloa ma o lea ua fuafua taiala ma faiga faavae talafeagai e faaleleia ai ia vaega.

***Vaega o Aoga***

Mai le Iloiloga o le Vaega o Aoga, o lo o faamau ai o Samoa le isi atunuu o le Pasefika o lo o tulaga lelei i le ausia o alafua. Peitai e mafai ona toe siitia atili i luga ma o lo o fautuaina nisi o vaega e tatau ona silasila i ai.

I le tala o le tupe leni, ua i ai le fuafuaga e ave le faamuamua i le atinae o aoga amata. E taua lea vaega aua ua faamaonia mai suesuega, o tamaiti e maua avanoa i aoga amata, e faigofie lo latou ofi atu i aoga mauululuga. O le a fetuutuunai foi tupe faaalu mai isi vaega ina ia avanoa ai seleni mo le atinae o aoga amata faatasi ai ma le lagolagosua a paaga mai fafo.

O le a iloilo foi le faasoa i le vaega o aoga tulaga lua ma kolisi mauululuga ina ia mautinoa e ausia taunuuga o loo tulimataia.

I tausaga ua mavae, sa faamamafa e le Malo le naunautaiga ina ia siitia le auunaga faapea avanoa tutusa i so o se tafa o Samoa. Mai le Iloiloga, o lo o manino mai ai, e l o tutusa le faasoa aemaise i le tulaga o faiaoga fua i tamaiti aoga. Ua i ai le fuafuaga o le a foia lea faaletonu e tusa ai ma le naunautaiga ina ia tutusa le faasoa.

Ua mautinoa e le Malo le taua o le siitia o le tomai ma le agavaa o faiaoga aua le aoaoina o alo ma fanau. E tatau la ona faasafua le avanoa i faiaoga uma o lo o moomia le toe faalatele o le tomai ma o le a faatulaga se faiga e fesoasoani ai i le totogiina o pili a faiaoga. O le a aofia ai ma se nogatupe e unaia ai faiaoga ina ia faaiou manuia le aoaoga.

O lo o faaauau i le Tala o le Tupe leni le faamuamua a le Malo i le atinae o aoga aua e faavae ai le lumana'i manuia o le atunuu. Ou te manatu foi o le finagalo lea o le atunuu ina ia faaalu tupe i aoga aua e taua mo le lumana'i manuia o alo ma fanau. O le laasaga muamua la leni i le faatinoga o fautuaga a le Iloiloga ina ia ave pea le faamuamua i le atinae o aoga.

***Vaega o le Soifua Maloloina***

O le atinae o le soifua maloloina o se vaega e ave pea i ai le faamuamua a le Malo i tausaga taitasi. Mai le Iloiloga o lo o manino ai le tulaga lelei o Samoa i le ausia o alafua aoatetele. Peitai e i ai foi luitau o lo o lag e tatau ona silasila totoa i ai.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

O le finagalo o le Malo e toe tuu faatasi le Matagaluega o le Soifua Maloloina ma le Auaunaga Faasoifua Maloloina, e atagia ai le naunau ina ia faasao seleni ma faasafua atu i vaega e manuia ai le atunuu lautele. O le a tuu ititia ai foi tupe faaalu i pulega faa-lotoifale, faaleleia le galulue faatasi, faapea le tuu ititia o le felavasai o tiute ma galuega fai. O leni fuafuaga o le a aafia ai tagata faigaluega e pei o fomaʻi ma tausii soifua. E taua tele le sao o i latou nei i le atinae o le soifua maloloina ma o le a mataitu totoa ina ia mautinoa e leai se aafiaga tele o i latou i le tuu faatasiga o ofisa e lua.

Peitai ua tatau ona agaʻi i luma ma faatino le finagalo le Malo. O le tuu faatasiga o Ofisa e lua e le faigofie ma e le mafai ona faatino vaega uma i se taimi vave. E manaomia pe a ma le 3 tausaga e vailili totoʻa ai vaega uma ina ia faatino i se auala manino ma le talafeagai.

O le vaega aupito sili ona taua i le atinae o le soifua maloloina o le maua lea e so o se tagata o Samoa avanoa tutusa i auaunaga faasoifua maloloina. O lo o tumau pea le maua o tupe faaagaga mo le atinae o le soifua maloloina ma e itiiti se avanoa e toe siitia ai. E tatau ona toe fetuunai tupe faaalu pe afai e i ai nisi vaega fou e fia faatino. O lona uiga e tatau ona fetuunai auaunaga i falemai tetele ina ia ave le faamuamua i togafitiga mo le fanau iti ma i latou o lo o alaala i nuu ma alalafaga i tua ina ia maua e nuu ma alalafaga i tua so o se auaunaga faasoifua maloloina. E tele ni aafiaga o leni suiga i le aufaigaluega faapea ma falemai ma e tele se taimi e manaomia mo le faatinoga, a o le mea mautinoa o le alavaa lea e tatau ona mulimuli ai.

O lo o manino mai foi i le Iloiloga le faatupulaia pea o le faamai oti (NCDs) ma o le luitau aupito ogaoga lea mo Samoa i le taimi nei ma le agaʻi atu i le lumanai. O le a tulituliloa pea le puipua ma le togafitia o NCDs e ala i faalauiloa i nuu ma alalafaga i tua. O le a ave foi le faataua i le soifua maloloina o tina ma tamaiti ma o le a galulue soosootauau foi ma a tatou paaga mai fafo ina ia saga unaia pea le siitia o le soifua maloloina o le mamalu o le atunuu.

**Fetuunaiga o Auaunaga a Ofisa o le Malo**

I tausaga ua mavae, sa tele le faamamafa sa ave i le taua o le fetuunaiga o auaunaga a Ofisa o le Malo. O lona uiga e tatau ona aupito sili ona lelei a latou auaunaga, aua o seleni e faaaluina i le tofaga o tagata faigaluega a le Malo, o seleni ia ua le mafai ona avanoa mo le atinae o aoga ma le soifua maloloina. O le mea moni ua tele suiga lelei ua maea ona faatino, peitai o lo o i ai pea vaega e ao ona faaleleia.

I le lua tausaga ua tuanaʻi, sa ou laga ai le sao taua o suiga faa-tekonolosi e mafai ai ona siitia auaunaga a Ofisa o le Malo. Ua tele suiga o le soifuaga ma ua tele ina faaogaina masini computers, faaoga upega tafailagi, email ma telefoni feaveai mo fesootaiga. O le feau taua, ua mafai nei ona siitia taunuuga ausia e faaalu se vaega tupe itiiti ona o le sao o suiga faa-tekonolosi.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

Afai e le mafai ona tatou faaogaina suiga faa-tekonolosi e siitia ai le auunaga, o lona uiga o tupe ma avanoa maumau. O se tulaga e le talia gofie e o tatou tagata faapea foi le Malo.

Ua tele fuafuaga ua maea faatino ina ia siitia le auunaga a Ofisa o le Malo. O le sini autu ina ia tuutiitia seleni faaalu i Ofisa o le Malo, ae faasafua i atinae mo le manuia o le lautele o le atunuu. Ua tele foi faitioga mai le mamalu o le atunuu e faapea o nisi ofisa e tuai le tali mai i manaoga o le atunuu, o nisi e umi le taimi e faataavale ai se mataupu. O nisi ofisa e le fia fesoasoani ma e tuai ona totogi tupe a le aufaipisinisi mo oloa ma auunaga ua maea ona faaoga. O le ituaiga amio lea e le tatau ona taliaina aua o le tagata faigaluega a le Malo o le auunaga a le atunuu, na te tautuaina tagata lautele i le lelei e aupito sili ona mafaia.

O lo o faagasolo nei le iloiloga o matafaioi ma tiute o le Ofisa o le Komisi e Pulea Tagata Faigaluega a le Malo. E manatu le Malo e taua le sao o le Komisi i le uunaia o Ofisa uma o le Malo ina ia siitia le auunaga.

O le a tagai foi le Ofisa o Tupe i auala e mafai ai ona fesoasoani i Matagaluega uma i le faasoatatau a latou seleni ina ia siitia ai le auunaga. O le a tagai ini auala fou e faafaigofie ai le faatinoga ma le mataituina o galuega a le Malo ma tuutiitia ai tupe e faaalu ai. E i ai le manatu e tatau ona i ai le saolotoga i Pule Sili o Matagaluega e fetuutuunai ai a latou seleni ma galuega faatino ina ia siitia ai le auunaga. E tatau foi ona tali ma lipoti mai le Pule Sili i le faasoaina o seleni aemaise o galuega faatino e tusa ai ma alafua ua maea ona faataoto e le Malo.

#### IV. OTOOTOGA O LE TALA I LE TUPE

Lau Afioga i le Fofoga Fetalai, o le oototoga leni o le Tala Faatatau Autu o le Tupe mo le Tausaga Faaletupe 2018/19:

<b>TUPE MAUA</b>		<b><u>\$ 849.48</u></b> miliona
<i>Tupe Maua Masani</i>	\$ 626.33 miliona	
<i>Tupe Faameaalofa mai Fafo</i>	\$ 223.16 miliona	
<b>TUPE ALU</b>		<b><u>\$ 932.92</u></b> miliona
<i>Tupe Alu Faale-Tulafono</i>	\$ 134.09 miliona	
<i>Polokalame o Tupe Alu</i>	\$ 547.61 miliona	
<i>Tupe Faaalu le Fuafuaina</i>	\$ 16.43 miliona	
<i>Tupe Alu i Atina'e</i>	\$ 234.78 miliona	
<b>FAASILIGA O TUPE ALU I TUPE MAUA</b>		<b><u>-\$ 83.44</u></b> miliona
<b>FAATUPEINA MAI:</b>		
<i>Nonogatupe e māmā tului mo atin</i>	\$ 70.57 miliona	
<b>TINOITUPE PA'Ū A LE MALO</b>		<b><u>-\$ 12.87</u></b> miliona

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

O le faasiliga o tupe alu nai lo tupe maua o lo o fuafuaina mo le tausaga faaletupe 2018/19 e \$83.44miliona po o le 3.5% o le tamaoaiga.

E ui i le tapulaa ua fuafuaina, o lo o i ai le naunautaiga o le Malo e uunaia pea le ausia o se tamaoaiga mauaa ma le mausali e faavae i faasiliga o tupe faaalu nai lo tupe maua e maualalo ifo nai lo le tapulaa e pei ona ausia i le tausaga 2015/16 lea sa faamauina ai le 0.4% ma le 1.1% i le 2016/17.

**V. FAVAE O TUPE MAUA**

Lau Afioga i le Fofoga Fetalai, o le aotelega o *Tupe Maua Masani* e faamoemoe e leai se suiga tele mai ile \$626.3miliona o lo o i ai i le taimi nei.

O lo o faamoemoe e ono tuutiitia i le 1.2% *Tupe Maua mai i Lafoga* ona o le toe fetuunaiga o tupe totogi mai e le EPC i luga o a latou nonogatupe. E ui i lea tulaga, o lo o faamoemoe o le a i ai ni sitaga i vaega taitasi nei:

- 10% o le a siitia ai lafoga i luga o tupe maua a kamupan ;
- 14% o le a siitia ai tupe maua i le puleaina lea o le v teatea i luga ifo o Samoa;
- 10% e siitia ai tupe totogi mai i Faalapotopotoga a le Malo i luga o latou tupe faasili;

E pei ona taua muamua, e faamoemoe o le a i ai se siitaga e tusa ma le 27% poo le \$8.3miliona i luga o *Tupe Maua e ese mai i Lafoga* ma o lo o aofia ai tupe maua a le Auaunaga Faa Soifua Maloloina e tusa ma le \$6miliona. O nisi nei o vaega o lo o fuafuaina e ono siitia:

- 43% e siitia ai le aoina mai o tupe maua mai lisi o fanua a le Malo;
- 15% se siitaga i tupe maua mai i le Vaavaaia lea o le felauaiga o fua o faaeleeleaga (Quarantine Services) ma o lo o atagia mai ai le siitia o nei auaunaga a le Malo;
- 12% o le a siitia ai tupe maua a le Matagaluega o Pisinisi, Alamanuia ma Leipa e tusa ai ma le toe fetuunaiga o le tau o a latou auaunaga e pei ona faatinoina i le tausaga faaletupe nei;
- 10% e siitia ai tupe e aoina mai i le Ofisa mo Femalagaiga e tusa ai ma le siitaga o le tau o pepa malaga;
- 5% o le a siitia ai tupe maua e ese mai i lafoga a le Matagaluega o Tupe Maua e atagia mai ai le siitia o le pulea ma le vaavaia o tulaga o oloa auina mai i fafo i tatou uafu ma malae vaalele.

O *Tupe Faameaalofa mai Fafu* o le a tuutiitia i le 8.4% e afua mai i le tele o poloketi tetele a le Malo ua maea i lalo o vaega o felauaiga, faatoaga ma le malae vaalele e aofia ai le poloketi mo le atinae o malosiaiga tau eletise faatasi ai ma le Tui Samoa Cable Project lea e faamaeaina i le tausaga faaletupe nei. E ui lava i le tele o nisi poloketi fou a le Malo o lo o fuafuaina i le tausaga 2018/19, o le aotelega lava o nei poloketi e itiiti ifo nai lo le tau atoa o poloketi ua faamaeaina i le tausaga nei.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

**VI. ATINA'E O LO O AVE I AI LE FAAMUAMUA**

Lau Afioga i le Fofoga Fetalai ma sui mamalu o le Palemene, o le aotelega o tupe alu a le Malo mo le tausaga 2018/19 o lo o fuafuaina lea e tusa ma le \$932.9miliona, e 1.7% e maualalo ai pe a fua i le tausaga o lo o faagasolo nei ona o le tele o atinae e tusa ma le 16% ua maea.

O tupe alu mo polokalame a Matagaluega mo le 2018/19 o le a siitia i le 5% mai i le \$520.95miliona o lo o faamauina mo le tausaga nei.

O le atinae aupito sili ona tele o le a faatino i le tausaga fou o Taaloga a le Pasefika lea o le a talimal ai Samoa ia Iulai 2019. E \$11.0miliona ua faaagaga mo lea faamoemoe. O se vaega tupe tele leni seleni sa mafai ona avanoa mo le atinae o aoga, soifua maloloina faapea atinae tetele pe ana lei Taaloga a le Pasefika. Peitai ua maea ona faamaonia e le Malo leni faamoemoe. E i ai le manatu o le a fesoasoani tele nei Taaloga i le filig o a tatou tama ma teine taaalo ma maua ai ni a tatou pine auro se tele. O lo o i ai foi le faamoemoe o le a tele se sao o nei Taaloga i le tamaoiaiga o Samoa ona o galuega tetele o le a faatinoina mo nei Taaloga.

O le a ou ootoina atu nisi o vaega o le a ave iai le faamuamua a le Malo mo le tausaga faaletupe o loma nei:

**1. Matagaluega o Faatoaga ma Faigafaiva**

- \$13.8miliona ua faatatauina e aofia ai le faatupeina o vaega nei:
  - \$228,500 e faamaea ai polokalame mo le toe totona o le talo, koko ma le niu;
  - \$150,000 ua tuuina atu mo le faatamaiaina lea o le manu ai niu;
  - \$140,437 e lagolagoina ai le Poloketi mo le Atinaega o Faatoaga lea ua faasolo atu i Salafai;
  - \$60,000 mo le toe totina o le Niu ma le Ulu;
  - \$300,000 e tuuina atu e lagolago ai atinae a le WIBDI.

**2. Matagaluega o Pisinisi, Alamanuia ma Leipa**

- \$6.5miliona e aofia ai le:
  - \$450,000 e fesoasoani ai i galuega faatino a le *Small Business Enterprise Center* po o le SBEC;
  - \$200,000 mo faalapopotoga tumaoti;
  - \$178,000 mo le polokalame faa Aperenitenisi a le Malo.

**3. \$11.91miliona mo le Pulega o Tagata Tafafao Maimoa mai Fafu:**

- \$5.4miliona le aotelega o vaegatupe e lagolagoina ai le faalauiloaina o Samoa i atunuu i fafo;
- \$442,000 mo tapenaga masani mo le Teuila faatasi ai ma le sailia o se tausala a Samoa ma le tausala a le Pasefika.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

4. **Matagaluega o Fesootaiga ma Faamatalaga Faatekonolosi**
- \$8.7miliona e aofia ai le \$5miliona mo le puleaina ma le vaavaaia o le Samoa National Broadband Highway.
5. **Matagaluega o Aoga, Taaloga ma Aganuu**
- \$85.6miliona e aofia ai vaega faamuamua nei:
    - \$13.2miliona mo le fesoasoani masani a le Malo i aoga o le lotu ma aoga faaitumalo;
    - \$3.2miliona mo galuega faatino i lalo o le Fuafuaga Faataatia mo le Vaega Maoti o Aoaoga;
    - \$1.1miliona mo meaaoga o aoga i nuu i tua;
    - \$1miliona mo le polokalame mo le siitia o faailoga taualoa a faiaoga.
6. **Matagaluega o Tupe**
- \$89.3miliona e aofia ai vaega faamuamua nei:
    - \$18.6miliona mo le Penisione masani;
    - \$11miliona aua tapenaga mo Taaloga o le Pasefika 2019;
    - \$4miliona mo le tau o lisi mo tatou Ofisa i Canberra, Magele ma Ueligitone;
    - \$2.8miliona mo le lisi o le upega o fesootaiga faatekonolosi o le DS3 mai i le ASH Cable;
    - \$7.4miliona mo le sao a le Malo i poloketi tetele e aofia ai:
      - Faaleleia o le auala mo vaalele (runway upgrade works) i Faleolo;
      - Poloketi mo le Auala Tele agai i Faleolo;
      - Faaleleia o le Auala Sim i Vaisigano;
      - Polokalame mo Fesootaiga ma Faamaumauga Faa Soifua Maloloina;
      - Atinae o Uafu;
      - Aoga mo Leoleo;
      - Maota mo Aganuu a le Matagaluega o Aoga;
      - Malae Faa Paaga ma le Malo o Saina.
7. **Matagaluega o Tupe Maua**
- \$13.2miliona e aofia ai se vaegatupe e \$900,000 e fausia ai le fale mo se masini faata e siaki ai uta auina mai i fafo ina ia siitia galuega puipuia i uafu ma malae vaalele.



29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

- 8. Matagaluega o le Va i Fafo ma Fefaatauaiga**
- \$23.2miliona e aofia ai tapenaga mo le taligamalo a Samoa i fonotaga nei:
    - Fonotaga o Minisita o le Va i Fafo o le Pasefika;
    - Fonotaga o Minisita o Fefaatauaiga o le Pasefika;
    - Iloiloga o le SAMOA Pathway;
    - Fonotaga Lona 6 o Malo o le ACP mo Fa'ato'aga ma Faiga Faiva.
- 9. Matagaluega o le Soifua Maloloina**
- \$11.75miliona e aofia ai tupe mo vaega nei:
    - \$2.9miliona mo le faafaigaluegaina o fomai ma tausi mai faauu;
    - \$400,000 mo auaunaga faa soifua maloloina o lo o lagolagoina e le Malo;
    - \$120,000 o le a tufatufaina atu i Faalapotopotoga o le Koluse Mumu, Sosaiete mo le Kanesa faatasi ai ma le Samoa Aids Foundation.
- 10. \$80.1miliona mo le Auaunaga Faa Soifua Maloloina e aofia ai vaega faamuamua nei:**
- \$6miliona mo le auina atu o mai i atunuu i fafo;
  - \$4.6miliona mo vaega moomia i le fale sue toto;
  - \$4.5miliona mo le faatauina o talavai;
  - \$2.5miliona mo vaega moomia i le fale talavai;
  - \$1.6milion mo le konekarate o taumafa mo le gasegase.
- 11. \$9.6miliona mo le Matagaluega o Falepuipui:**
- \$3.9miliona e faamaea ai le vaega muamua o le Falepuipui i Tanumalala e aofia ai le fausiaina o le auala ma le faaooina atu o le suavai.
- 12. Matagaluega o Punaoa Faanatura ma le Siosiomaga**
- \$25.6miliona e aofia ai:
    - \$2.5miliona mo galuega faatino i lalo o le fuafuaga fa'ataatia o le vaega o le suavai;
    - \$4.5miliona mo konekarate o le aoina o lapisi ma isi auaunaga o lo o faaaogaina e le Matagaluega;
    - \$2.6miliona mo tau i o fanua.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

**13. Matagaluega o Galuega, Felauaiga ma Atinae Tetele**

- \$18.7miliona e aofia ai:
  - tai \$2miliona mo le Pulega o le Suavai ma le Pulega o le Malosiaga Tau Eletise mo galuega faam m avega i nuu i tua;
  - \$9.1miliona mo galuega a le Pulega o le Suavai;
  - \$910,325 mo galuega tau felauaiga i le vanimonimo o lo o faatupeina lea i se lafoga mo le saogalemu.

**14. \$25.8miliona mo le *Pulega o Felauaiga i le Laualeele:***

- \$8.7miliona mo le fausiaina o auala fou;
- \$14miliona mo galuega faalelei i auala;
- \$3.6miliona mo le faaleleia o ala vai i lalo o le fuafuaga fataatia o le vaega o le suavai.

**VII. TUPE LE FUAFUAINA**

O le aofaiga o tupe le fuafuaina o lo o faatatauina mo le tausaga faaletupe 2018/19 e tusa lea ma le \$16.4miliona.

**VIII. TUPE ALU I ATINA'E**

Lau Afioga i le Fofoga Fetalai, o lo o lagolagoina atinae uma a le Malo i fesoasoani mai i a tatou paaga masani e ala i polokalame eseese o lo o faatupeina i tupe faameaalofa ma nonogatupe mo le tausaga faaletupe o loma nei ma o nisi nei o atinae tetele o lo o aofia ai:

- \$129 miliona mo Vaega Maoti o Felauaiga ma Atinae tetele aua le faalelei o auala, auala sim aemaise ai foi malaevaalele;
- \$36.9miliona mo le Vaega Maoti o Siosiomaga aua le nofo sauni ia vave tali au i fesuiaiga o le tau;
- \$7.1miliona mo le Vaega o Aoaoga ina ia siitia avanoa mo aoga mo le fanau aemaise le siitia o auunaga faale aoaoga mo fanau;
- \$5.4miliona mo le Vaega o Soifua Maloloina mo le siitia o tulaga o fesootaiga ma faamaumauga e aofia ai foi le siitia o faamaumauga a le fale talavai.

**IX. TALA FAAOPOOPO O LE TUPE 2017/18**

Lau Afioga i le Fofoga Fetalai, ou te tuuina atu foi i luma o le Laulau a Fono a le Palemene le Tala Faaopoopo Lona Lua o le Tupe mo le tausaga faaletupe 2017/18. O lenei Tala Faaopoopo Lona Lua o le Tupe e l aafia pe suia ai le faasiliga o tupe faaalua nai lo tupe maua e pei ona i ai nei.

29 ME 2018

**Saunoaga o le Tala Faatatau Autu o le Tupe 2018/19**  
*“Filifiliga Toa”*

**X. UPU FAAI’U**

Lau Afioga i le Fofoga Fetali ma sui mamalu o le Palemene, e pei ona ou taua muamua, o lo o tulaga lelei lo tatou tamaoaiga i le taimi nei ma le agai atu i le lumanai. O lona uiga o se siosiomaga lelei mo le atinae o pisinisi ma maua ai avanoa faigaluega mo o tatou tagata. O le a faatupulaia ai foi ma tupe maua a le Malo e faasafua atu e faatupe ai manaoga o le atunuu lautele.

Peitai e ao pea ona tatou mataala aua e lamatia pea lo tatou tamaoaiga e le tele o luitau. O lona uiga e tatau ona faaauau pea le fausia o faiga faavae ma taiala talafeagai e lagolago ai se tamaoaiga mauaa ma le mausali. Aua o le faavae lea e mafai ai e le Malo ona faatupulaia avanoa mo se lumana’i manuia o o tatou tagata.

O le a faaauau i lenei Tala o le Tupe le naunautaiga o le Malo ina ia siitia le soifua manuia o o tatou tagata aemaise le faasoa tutusa o le tamaoaiga. E taua lea tulaga e le gata mo le taimi nei ae faapea foi le fausia o se lumana’i manuia ma le saogalemu. O lona uiga e tatau ona mau le toovae i le faafoeina o lo tatou sa aua se lumanai manuia mo tagata uma o Samoa.

E fia faamauina foi le agaga faafetai tele ma le faamalala le tatou Malo ma le atunuu i a tatou paaga masani mo lo latou sao taua i le atinae o si o tatou atunuu.

E avea foi lenei avanoa e faafetaia ai le mamalu o le atunuu mo lo outou sao taua i le atinaeina o si o tatou atunuu.

O la matou tatalo ia i ai pea le agalelei ma faamanuiaga a le Atua ia Samoa atoa a o tatou alo atu i le faamanatuina o le 56 tausaga o le tutoatasi o si o tatou atunuu.

Lau Afioga i le Fofoga Fetalai ma Sui Mamalu o le Palemene, i lou agaga faaaloalo tele, ou te tuuina atu ai le Tala Faatatau Autu o le Tupe, mo le tausaga 2018/19 mo le lauiluina e le Palemene.

Soifua.

**FOFOGA FETALAI:** Ua faafofoga i le saunoaga malamalama ma le saunoaga manino a le Minisita o Tupe, ia malo faafetai, malo le tapena, e le faigofie le galuega, aemaise o lau Afioga ma Faauluuluga foi o Matagaluega o i latou o lo o faapena ona tofua sao i le faatinoga o le tatou galuega.

Ma e tusa ai ma Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe 2018/2019 e le itiiti ifo i le 14 aso, a o tuuina atu le Tala Faatatau Autu o Tupe 2018/2019 i le Komiti o Tupe Maua ma Tupe Totogi mo le iloiloina, ma toe lipoti mai i le Fono Aoao.

Ma ou te tapa lau Afioga i le Taitai o le Malo mo le avanoa foi lenei mo sou finagalo po o sau Saunoaga Faaminisita e te malele ma saunoa ai e tusa ai o le tatou galuega ma le fono.

29 ME 2018

### Saunoaga Faaminisita a le Afioga i le Palemia

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ia se i patipati mai tatou i le manaia o le Tala o le Tupe o le a faafoe ai lo tatou Malo i lena tausaga fou.

*Na faaalua le agaga fiafia o le Palemene e ala i le patipati o o latou aao ina ua maea le Saunoaga Faaminisita a le Afioga i le Minisita o Tupe.*

### SAUNOAGA FAAMINISITA A LE AFIGA I LE PALEMIA

**Susuga Hon TUILAEPA AUJLUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** ðLau Afioga i le Fofoga Fetalai ma Sui Usufono mamalu o le Palemene o Samoa faapea foi Samoa o lo o ua potopoto i lenei Maota ma Samoa o lo o faafogafoga tapuai mai, aua le paia o Aiga ma latou Tama, faapea foi le Usoga a Tumua ma Puleono i Salafai, ae a le tapuaiga a Auauna o le Talalelei o lo o taputapuai mai ma faanonomanu mo se manuia o Samoa.

Ou te faafetai i le alofa ma le agalelei o le Matai Sili i le lagi, o lo o malutapuaaoina ai pea le folauga a Samoa.

Ae ua ou tulai atu ma le ava tele lau Afioga i le Fofoga Fetalai ma le Maota lenei, e fai sina au Tautalaga Faaminisita i le mataupu ua folasia i malae i le faaiuga a le Ekalesia Faapotopotoga Kerisiano Samoa po o le EFKS, sa teena ai le Tulafono, ua uma ona pasia e lenei Maota o le Palemene o Samoa, e faatulaga ai le faia o lafoga a tatou Faafeagaiga. O se auala lea e faafoe e Malo uma o le lalolagi, e faamalositia ai le vavae e le Malo o tupe mai ia i latou e tele a latou tupe e fai ai galuega ina ia faalautele atu le manuia i le lautele o le atunuu e laitiiti a latou foi mea e maua. Ona e aupito inosia e latou e tele a latou tupe lenei ituaiga faiga, o le ala lea e faatulafono ai e le Malo nei mea o lafoga. Aua afai e le faatulafonoina ae lafo atu i le loto faitalia e fai ai saofaga a tagata i galuega fai a lo latou Malo mo latou e le maualuga lo latou tamaoaga, e atili tupu ai le va o e maumea ma e matitiva.

O se mataupu faigofie tele, faigofie, ae ua soona faanenefu e nisi ua lalafi ma taotau ai fua le suafa paia o le Atua, e tau faamalumalu ai se solitulafono.

Lau Afioga i le Fofoga Fetalai, e taua tele le taumafai mulimuli atu lenei a lo tatou Malo e toe faamalalalama le mataupu lenei, ona e ui lava ina 56 tausaga talu ona tutoatasi lo tatou Malo o Samoa, ua faavae foi i le Atua, o lo o faalagolago i lafoga e faatino ai ana galuega fai, ae aliali mai e i ai lava i latou e le fia malamalama i le uiga ma le faataatiaga o tatou Faigamalo, po o le musu foi e fia malamalama, ina ia saofaga ai pea le soifua olaolanoa, e le faia ai ni o latou sao i le atinae o si o tatou atunuu vaivai o Samoa.

29 ME 2018

### Saunoaga Faaminisita a le Afioga i le Palemia

O le taua o lenei faamalamalama a lo tatou Malo, e le o se Malo fefoifoiai, e le o se Malo foi e femoumouai ina ia manino ma nofouta ai foi i aulape ma taunuuga, e tulituliloa ai e lo tatou Malo lenei mataupu e pei o le masani a Malo uma o le lalolagi. Mai lava i le tausaga foi na soifua ai lo tatou Alii Faaola i lenei lalolagi, sa lagalaga ai lava le mataupu lava lenei o lafoga. Ae o le uiga lava foi lea e tasi ua toe savavali ai foi nisi i le aualatele e faaali o latou finagalo tetee i se tasi foi o Tulafono e aofia ai lava ma le Faavae o le Malo o Samoa, o lo o malupuipua ai Fanua Faale-Aganuu mai lava i le amataga o le tatou Malo Tutoatasi, se i tau mai lava i lenei vaitau. O lo o mautinoa e leai, leai se Faigamalo malamalama i lenei lalolagi e faatali ni ana polokalame mo le manuia lautele o tagata, seā muai faamalieina i se fuafuaga a se ekalesia ona faatoa fai lea.

O le mea moni lau Afioga i le Fofoga Fetalai, afai e faapea ni Faigamalo, e uma le olaga lenei, e leai ni fuafuaga atiae a se Malo e mafai ona fai, ae o le a olaolanoa ma ola uafalolo ai tagatanuu aemaise i latou o o e vaivai lo latou tamaoaga. Faafetai tele i Ekalesia uma e ese ai, i o latou Taitai ma tagata lotu uma i lo outou faimalo, i lo outou finagalo malamalama i galuega fai a lo outou Malo. O outou mama na.

O le pule a le Palemene o Samoa, ua manino malosiaga aiaia o le Fono Aoaofa o le Malo lenei a Samoa e talanoaina ai tonufai o le Malo. E le gata i lea, e iloiloaina ai foi Tulafono Tau Faaofi mo le atinae manuia ma le aoga lelei mo tatou tagata. O nei Tulafono Tau Faaofi, e maea loa ona pasia e lenei Maota, ona tuuina atu loa lea i Le Ao Mamalu o le Malo, mo lana faamaoniga ma avea ai loa ma Tulafono a lo tatou Palemene, e ao ina aloaia e tagata uma o Samoa.

O nisi o nei Tulafono, e mo le malupuipua o aia ma saolotoga o tagatanuu, ae o nisi e agavaa ai le Malo, e fai ana fuafuaga lelei auiluma mo le atinae manuia o o tatou tagata. E faamemelo uma i ai tagata lotonuu i lo latou Malo ua tu, i lo latou Malo ua mafai ona fai e tagata Samoa lava i lo latou lava maemae ma lo latou sailimalo.

O lona uiga o a lava Tulafono e pasia e lenei Maota ma faamaonia e Le Ao Mamalu O Le Malo, e leai se isi malosiaga faale-Tulafono i tua atu e mafai ona latou faaleaogaina ai, vagana ua toe faia i le auala lava lenei e tasi faale-Tulafono, e iloilo e le Maota lenei, ma tuuina atu faamaoniga O Le Ao o le Malo. O ala ia o mea, e fai e tagata malamalama.

E leai, leai se faatulagaga i a tatou Faigamalo e pasia ai e lenei Maota se Tulafono ma faamaonia ai e Le Ao Mamalu o le Malo ae toe liliu i ai se tofa ma se faautaga a se Faalapotopotoga ina ia faaleaogaina. E leai se isi fonofono e sili atu i le Fono lenei a le Palemene, i le faia o tonufai a Samoa, o le uiga lea e faaigoa ai le Fono lenei, o le Fono Aoaofa o le Malo Tutoatasi o Samoa.

E leai foi ma se isi po o ai lava na te toe faatauta i ai, ae o le mau faale-Tusi Paia, o pule uma lava o fai nei e Malo o le lalolagi e aofia ai ma Samoa, o pule lava mai le Atua. O le pule o lo o faavae ai foi le Malo o Samoa.

29 ME 2018

### Saunoaga Faaminisita a le Afioga i le Palemia

Ae o le Fono Aoaofa Faitulafono lenei a Samoa, o le Fonousu a sui usufono filifilia o le atunuu e filifili e tagatanuu e momoli mai ai o latou finagalo i so o se mataupu e tagofia mo le atinae ma le lelei auiluma o Samoa. Aua e le mafai, le mafai, le mafai ona omai uma tagata uma o Samoa e fai. O lona uiga, o a ni finagalo o tagatanuu i so o se mataupu e tagofia e le Fono Aoaofa Faitulafono, e tasi lava le auila e tagofia ai e faaui mai i o latou sui filifilia ma talanoa i le Fonousu lenei a le Palemene. E faatautaia e lau Afioga i le Fofoga Fetalaia avanoa tatau ai mo sui usufono uma e sausaunoa seia oo lava ina saausi felafolafoaiga i se mataupu i lau faatautaiga e le faaituau, ae faatautai i le amiotonu. Peitai, e i ai foi avanoa o so o se tagatanuu i le faagasologa o mataupu e faasee atu ai e le Fono Aoaofa Faitulafono i ana Komiti Faa-Palemene e mafai ai foi ona faaalua saoloto o latou finagalo. O le faatautaiga lea o a tatou faigamalo faatemokarasi o lo o aiaia i le Tulafono Sili a le tatou Malo, o le Faavae lea o le Malo Tutoatasi o Samoa na fausia e o outou tuua ma o matou matua i le Fono Faavae na talanoaina ai le Faavae o le Malo Tutoatasi o Samoa, lea lava tatou te solisoli muliaa i ai, o uiga aupito amiotonu ia o lo o faagasolo ai galuega a le Palemene lenei. ***O faaiuga uma lava la e faia e lenei Maota, e faia e sui usufono filifilia o tagatanuu mo tagatanuu uma o Samoa. O ai lava la le tagata, se Faalapotopotoga po o se Ekalesia e tetee i lenei faatautaiga, ua tetee foi i le Malo Tutoatasi o Samoa.*** I le faaupuga tuusao faigofie, ua i ai le faasiliaupule, ua fua le pule a le Malo Tutoatasi o Samoa. A sao mea faapenei, talofa e, e le toe aloaia se faigamalo i le lumanai. A tulai mai na faigamalo i le lumanai e ulagia e tagata lautele. O avanoa faatulaga e fai ai sao o tagata i tonufai a le atunuu ua faatulaga lea i avanoa e faaalua ai finagalo o tagatanuu ma so o se Faalapotopotoga i le talanoaina o tonufai a le atunuu ma lana faigamalo. So o se Tulafono Tau Faaofi lava e faasee atu e le Maota lenei o le Palemene i Komiti Faa-Palemene mo le iloilo ina totoa ma toe lipoti mai i le Fono Aoaofa Faitulafono lenei, o se galuega e fai ma le totoa. Lea faatoa tatou faalogologo foi i le taeao nei o faatu mai le lafo e toe tuu atu se avanoa ina ia faaauau ai suesuega a tatou Komiti, o le galuega e le mafai, le mafai ona faatopelaua ona e aafia ai aiatatau a le atunuu atoa, o augatupulaga o lo o soifua nei ma augatupulaga o le a soifua mai i le lumanai. O ai lava la e finagalo e faali sona finagalo i se Tulafono Tau Faaofi o iloilo ina e se Komiti Faa-Palemene, e maua le avanoa pe a fesootai mai i le Failautusi ma le aufaigaluega a Komiti Faa-Palemene, aua e faasalalau atu foi i TV ma Leitio ma le Nusipepa avanoa faapenei. O le avanoa lea sa tatau ona faaaua e le Ekalesia po o so o se tagata lava e fia faaalua o latou finagalo i le Tulafono o Teuteuga o le Tulafono o Tupe Maua 2017 po o le tausaga na tea nei, ua aiaia ai le faia o lafoga a Faifeau. E leai nisi avanoa i fafo atu o avanoa faatulaga nei faaletulafono, pei ona atagia mai i le faaiuga a le Fonotele a le EFKS, e foliga ai, e fai fuafua Tulafono uma a le Palemene nei a le Malo o Samoa i se finagalo o le Fonotele a le EFKS.

29 ME 2018

### Saunoaga Faaminisita a le Afioga i le Palemia

E leai foi nisi talanoaga i tua atu o le faatulagaga lenei, aua e leai se malosiaga e suia ai Tulafono a le Palemene, vagana lava le Palemene lenei o lo o i ai le pule aua o Sui uma i latou o tagata lautele o lo tatou atunuu. Ae ui foi i nei avanoa, e fai fuafua faaiuga o iloiloga a so o se Komiti Faa-Palemene i le finagalo o le Fono Aoaofaitulafono. O fea lava e mafuli i ai, e fai lava le finagalo o le Fono Aoaofaitulafono. O le uiga foi lea o a tatou Faigamalo Faatemokarasi, e filifili mai ai e tagatanuu o latou sui filiifilia e faia tonufai mo tagatanuu o Samoa, o fea lava e mafuli i ai finagalo o sui filifilia, e faatonu folau lea i galuega a lo tatou Faigamalo. O taijala faavae manino nei ma matamatatetele e limataitaiina ai sui filifilia ma le Fono Aoaofaitulafono, e noatia ai foi tainane se eseese o finagalo ma taofi. O pulega lelei o se atunuu po o se Malo, e faavae i Tulafono e soifua filemu ai tagata uma o le atunuu, o tagata o le Atua. O le mafuaaga foi lea e le taumatea, na afio mai ai lava le Atua o le lagi ma le lalolagi, tuulima i Lana Auauna o Mose Tulafono e 10 e limataitaiina ai Lona Nuu o Isaraelu, ina ia ola le Tulafono, ina ia ola, l'olaolanoa. Na soifua mai foi lo tatou Mesia i le lalolagi nei i le 2018 tausaga talu ai, ua 617 Tulafono ua soona f l ma faafenumi ai e le Au Faresaio Tulafono e 10 o ni Tulafono faigofie ma malamalamagofie a le Atua. Ma na iu lava ina toe finau ai i latou ma Iesu, o le lua o suafa Peresona o le Tolutasi Paia na fausia le tagata soifua ma faataatitia Tulafono na tuu atu ia Mose.

O le tiute ma le matafaioi a so o se tagata lau Afioga i le Fofoga Fetalai ma sui usufono mamalu o lenei Maota, e taua tele ona tatou nofo malamalama i ai, i le eseese o mea nei e lua. Muamua, o lo tatou tiute o tatou o le afaatuatua kerisiano i lo tatou Atua. Ma le vaega lua, o lo tatou tiute o tatou o tagatanuu o Samoa, i lo tatou atunuu pele o Samoa. E latalata tele sootaga o mea nei e lua, aua e Faavae Samoa i le Atua. Peitai, e iloa le va vavae pe a iloilo lelei le tagata i lona lava loto e eseese ai o tatou tiute ma matafaioi, e i ai lo tatou tiute ma le matafaioi, o tatou o le Afaatuatua Kerisiano e auauna ai i lo tatou Atua, ae i ai foi lo tatou tiute ma le matafaioi a o tatou tagata, o tagata Samoa e auauna ai i lo tatou atunuu o Samoa atoa. Vagana ai la se kerisiano e le o se Samoa, ona auauna lea i le Atua ae leai, leai sona sao mo lona atunuu o Samoa, po o se Samoa foi e le o se kerisiano, ona auauna lea ia Samoa, ae leai, leai, leai sana auaunaga e fai i le Atua.

O le tatou tiute lenei, o tatou uma o tagata faatuatua kerisiano, tatou te tautua ai i lo tatou Atua ma tatou faia ai Lona finagalo ma faasoa Lona alofa e tusa ona Ia alofa fua mai ia i tatou. A o lo tatou tiute foi o tatou uma o tagatanuu o Samoa, o le fai o ni o tatou sao i le tautuaina ma le atinae o si o tatou atunuu pele o Samoa. E le tau faamatalaina atu, e leai se tamaoaiga faalenatura o Samoa e tatou te faamoemoe ai e pei o suauu mai le manava o le eleele o lo o ~~æææ~~ ai isi mau atunuu o le lalolagi, vagana ai lava le sao o tatou tagatanuu taitoatasi.

29 ME 2018

### Saunoaga Faaminisita a le Afioga i le Palemia

E ao foi ona manino lelei o le Malo e le o se Malo na o le Maota lenei, e le o se Malo na o le Kapeneta, e le na o se Malo foi a le aufaigaluega galulue a lo tatou Malo, a o le Malo o Samoa, o le Malo o tagata uma e aofia uma ai so o se tagata Samoa o lo o tapuai i so o se ekalesia e aofia ai ma latou e ola faapaupau, e mafai ona fai lona sao i le atinae o Samoa, mo le manuia auiluma o Samoa, ma lagonaina le tiute e fai se sao mo le atinae o Samoa ona le tatau lea ona lalafi i tua o ni talitonuga i se tulaga faapitoa faale-Atua, e le tatau ai ona faia ni sao mo le atinae o Samoa. E faamaulalo ai, ua na o ni Auauna a le Atua, e pei foi o tatou, ui ina eseese o tatou valaauina, ae le aveesea ai le tiute e fai le sao mo le atinae lautele o lo tatou atunuu.

Lau Afioga i le Fofoga Fetalai ma le mamalu o lenei Maota faapea le faafogafoga tapuai mai a Samoa, o le tiute o so o se tagata le tautua atunuu, tainane po o fea ua valaauina ma faaaogaina ai e lo tatou Atua. Pe filifilia e avea O Le Ao o le Malo ma isi tofiga taualoa a le Malo, pe valaauina foi i le Galuega a le Atua, e le aveesea ai le tiute o le tagatanuu o Samoa e fai sona sao mo le manuia auiluma o isi tagatanuu a Samoa. O ai lava la le tagatanuu o Samoa e musu e fai sona sao i le atinae o Samoa, ua lē fia Samoa, sa sili ai ona ia soifua i se isi atunuu ma alaala ai i se isi atunuu. Aua e le matagofie i le vaai ma le maimoa a isi o lo o fai o latou sao, le tilotilo atu o aooga le fanau i aoaoga o lo o latou faatupeina i a latou lafoga, o lo o togafiti foi a latou fanau i le maota gasegase o lo o latou gasea ai, o lo o maua a latou penisione, o se auala lea e toe faafoi ai lafoga sa totogi o lo o tumutumuvale foi le aualatele i a latou taavale feilafi ae leai so latou sao i le faaleleia o auala. E oo i le faavavau e faasiugutua pea i latou e i latou o le au fai sao i le Malo aua ana galuega fai.

Ua agiga foi i talitonuga faivavale o le Tulafono lenei a le Palemene e faamalosia ai le fai o lafoga a faifeau o le a matua tifato ma faatoilaloina ai le Faigamalo lenei a le Vaega Faaupufai e Puipuia Aia Tatau a Tagata, o se talitonuga papau a i latou e papau foi le latou faautaga. Aisea? Aua o le galuega patino lea a le Atua soifua o le tofia ma filifilia taitai o Samoa e faatulai mai e faafoea le Malo o lo o faavae ia te Ia. A ia tatou manatua foi, na o ni nai tagata lotu toaitiiti ma sui o le nuu, sui o le Ekalesia e auai i le Fonotele, a o le toatele lava o le aufai tonu e faia iuga ogaoga a le nuu o lo o taputapu mai i fanua, o i latou na o le aufaitofa, o le au tootoosinasina ma le au tootoouli e faia iuga ogaoga mo le lumanai manuia o le nuu, le Ekalesia ma le itumalo. Ua faaoloatauaaina foi e faapea, ua le alolofa le Malo i le Ao o le tatou Malo e lalafi ai i tua e mumusu e fai ni sao i le atinae o le atunuu, ae le o faapitoa faamanuiaga a le tatou Malo na o tagata na tautua na fai ni sao i le tatou Malo o Samoa. O lea ua faafogafoga manino Samoa i fuafuaga alualumamao faataotooto tau tupe a le tatou Malo mo le tausaga fou.



### Saunoaga Faaminisita a le Afioga i le Palemia

E \$932miliona mo atinae eseese, aua o tatou tagatanuu o lo o faatupe mai i lafoga a latou o le aufaisao e le gata i Samoa nei, ae faapea foi ma le aufai lafoga a isi atunuu o lo o alu lo latou afu e fesoasoani mai ai ia Samoa ona o le faaaoga tatau ma le faaaoga lelei o lo latou afu i fuafuaga mamao o galuega e tausi ai aiga e pei ona i ai foi fuafuaga a le tatou Malo ina ia maua pea galuega e o atu ai a tatou fanau ma galulue i faatoaga i Niu Sila faapea foi ma Ausetalia, lea ua taoto fuafuaga e ono oo atu i le tolu tausaga fanau o i latou e amio lelei ma amio taupulea ina ia aua nei faamataga ai le igoa o Samoa, e o atu e galulue ma saili manuia mo latou aiga o lo o taputapu ai atu i Samoa nei. O le faatinoga lena o le Tulafono Sili a le Atua o le alofa e afua ai Tulafono uma o lo o fai nei e le tatou Malo e pei o le Tulafono o Lafoga.

O le totogi o lafoga e avea ma sao o Faifeau e le o se faiga fou sa totogi foi lafoga a Faifeau i Samoa nei i le taimi o pulega a Siamani, faasolo mai ai pulega a Niu Sila e faapei ona faamanatu e le Savali i na ona aso, e leai, leai, leai se faifeau o le LMS na tetee i ai i na ona aso aua sa latou apoina o se mea e tatau. O lo o totogi lafoga foi Faifeau i Niu Sila ma Ausetalia, o lo o totogi lafoga foi le toatele o Faifeau a le EFKS e le o galulue i totonu o nuu, ma o lea o lo o ou umia faasilasilaga nei a le Savali i le tausaga e 1911 i taimi o Siamani ma le tausaga 1924 o lo o faamanatu mai ai e Malo i na taimi ia i latou ia manatua ma tautuana le totogi atu o lafoga a faifeau. O le toatele o tagata matutua o lo o maua nei penisione, e le i galue i le Malo, e aofia ai ma Faifeau malolo manumalo a le EFKS, ma e le faapito foi faamanuiaga faasafua a le Malo na o fanau e faisao i le atinae o Samoa. E le mafai le mafai le mafai ai ona amanaia e le Malo taumafaiga nei e solipala Tulafono na iloiloia e lenei Maota ae tuuina atu ai lava pea faamanuiaga masani a le Malo. O ai lava la ua tetee i Tulafono e pasia e lenei Maota, ua tetee foi i le Palemene o Samoa, ma e faagasolo lava tualumaga e faasaga i ai e pei ona faia i so o se tagata e solia Tulafono e pasia e le Palemene lenei o Samoa. Ua 56 tausaga talu ona tatou Tutoatasi, ua 56 foi lea o tausaga o malolo pea tatou Faafeagaiga mai le totogiina o lafoga, lea faatoa tapa e le tatou Malo e fai so latou sao i lea foi auala ua tapa ai. O le manatu, ua lava ma totoe lenei malologa umi i le 56 tausaga o malolo pea, malolo pea, a o lenei faatoa tapa se latou sao.

Lau Afioga i le Fofoga Fetalai, e le o ni upu e avane ai se i tulou, ua faatu e le EFKS po ua faata e le EFKS se laau malos i ulu o le Faigamalo lenei ua mafuli i ai sui usufono filifilia o lenei Maota, o le Ao foi o le Maota ma le Palemene lenei, ma e le mama i le tatou Malo lenei tulaga. Ua ou talanoa faamalalama i le faatulagaina o mataupu e faagasolo i le Maota lenei ma avanoa e faisao ai tagatanuu e pei ona i ai i polokalame faalauiloa a lo tatou Palemene ina ia silafia lautele ai e o tatou tagata a tatou foi faiga Faa-Palemene ma avanoa e tele e fai ai ni o latou sao, peitai, ua manumalo ai ai le le fia malamalama ma le tetee.

29 ME 2018

### Saunoaga Faaminisita a le Afioga i le Palemia

O le mea moni lau Afioga i le Fofoga Fetalai, ua lapelapea le faatofalaiga ona o le malosi uiga ese o le tuualalo faataulelea e pei foi ona sasi ai le tupu o Reopoamo. Peitai, o le itu sili o lo o maua ai pea le mafanafana aemaise le faafogafoga mai a le Ekalesia EFKS ma isi foi Ekalesia, ona o lo o mau pea le toovae i le loaloa o le Ekalesia EFKS ma nisi foi o Faafeagaiga ua resitala ma ua usitaia le Tulafono o Lafoga. Faafetai i le tofamamao. E faamalo foi i le Susuga i le Failautusi o le Ekalesia o lo o maua lava o lo o e toaga e totogi au lafoga, e ui lava ua agiga lou uunaia malosi o isi Faifeau e aua. Ua moni ai le lauga a le isi Faifeau, a oo ina uma ma faaiu lana upu apoapoai i le Ekalesia i le Aso Sa, ona ia faapea lea, õuso e ia Keriso, o loa e fai e pei ona ou fai atu ai, ae le pei ona ou fai.õ Ua maea atu le faamalamalama mulimuli a le tatou Malo i lenei mataupu faigofie tele, pei ona pasia ai le suiga o le Tulafono o Tupe Maua ia Iuni 2017, e faapea foi le ono masina mo le faalauiloaina o lenei Tulafono, na amata faamamalu ia Ianuari 2018. O le masina fou ia Iuni 2018 o le a 6 ai masina talu ona amata ona faamamalu ai le Tulafono ma o le a faagasolo loa e le Matagaluega o Lafoga la latou matafaioi e faapei ona masani ai. Ae o lo o loma foi sa matou feiloaiga ma Taitai o le Ekalesia e pei ona agiga i le ea. Ma sa ou faatali i le aso ananafi, ou toe faatali foi i lenei taeao. Atonu a faataunuuina lenei feiloaiga i se aso ona maua ai lea o se malamalamaaga lelei ma e faiaso pea le Atua.

Ia manuia le faamanatuina o le 56 tausaga o le Tutoatasi o le Malo o Samoa.

Lau Afioga i le Fofoga Fetalai o le faaiuga lena o le Lauga Faaminisita. Soifua ma ia manuia.õ

### TOLOPOINA

**FOFOGA FETALAI:** Malo faafetai. Ma ua manino le faafogogaaga a le paia o le Palemene e tusa ai o le saunoaga a le Palemia e tusa ai o le mataupu e pei ona malele ma saunoa i ai le Palemia. Ma e le o po se lilo i le tulaga e pei ona tulai mai. Ma e manatu foi ua manino foi le faafogoga tapuai mai a Samoa i ona itutino eseese e le gata i le atunuu i tupu ma ee i le latou foi tapuaiga faa-tausi itumalo, aiga ma afioaga, ae faapea foi le faafogoga tapuai ma ii faaululuga ma feoi o le talalelei o lo o faapena ona latou asu le vai o le ola ma faanonomanu i le Atua ina ia maua e Samoa se atunuu manuia e faavae i le Atua. E pei lava foi ona maua faafetai i o outou tuua ma o tatou matua ua faapena ona latou tuu atu Samoa e filifili e le Atua ina ia ave Samoa o se Malo Tutoatasi e faavae i le Atua.

29 ME 2018

### **Tolopoina**

O le agaga lena pei ona taoto i finagalo o tuua ma matua e pei ona latou asaina le malu o le tai taeao. Malo malele i lau Afioga i le Palemia e tusa ai ma polokalame o fonotaga a le Palemene, ona o lea ua tatou taunuu i le siui o Taulumaga a le Palemene, ua tolopoina nei le Fono Aoa seia aulia le Aso Lua, 19 Iuni 2018 ina ia faapena ona tuuina atu le 14 aso e soalaupule ai e le Komiti o Tupe Maua ma Tupe Totogi a le Malo le galuega i le Tala Faatatau Faaopoopo o le Tupe ma le Tala Faatatau Autu o le Tupe 2018/2019 ma toe tuuina mai i le tatou Palemene i le Fonotaga o lo o muamua.

Ou te faasilasila atu ua tolopoina nei Taulumaga a le Palemene seia aulia le Aso Lua, 19 Iuni 2018. Ma e avea foi lenei avanoa e momoli atu ai moomooga alofa ina ia tatou maua le tatou Tutoatasi i se aso o lenei vaiaso, Aso Faraile ina ia faapena ona avatu i ai e le Atua le soifua e le gata O Le Ao Mamalu o le Malo ae faapea foi le Sui o le Fono a Sui Tofia, e faapea foi le mamalu o lenei Palemene i le afio o le Palemia ma le Kapeneta ma sui usufono mamalu, ae faapea foi i le Faamasino Sili ma alii ma tamaitai o le faamasinoga, aemaise o le aoatetele o le atunuu ina ia tatou aulia ma le manuia le faailogaina o le Tutoatasi o si o tatou atunuu i se aso o lenei vaiaso.

O le a ou faaiuina le tatou Fonotaga i se tatalo.

*Na tolopo Taulumaga a le Fono Aoa Faitulafono i le itula e 10:53 i le taeao seia aulia le itula e 9:00 i le taeao o le Aso Lua, 19 Iuni 2018.*